

Բաղկացած է 9 թերթից

տպագրված է 2 օրինակից  
օրինակ 2

**«ՀԱՍՏԱՏՎԱԾ Է»**

ՀՀ շրջակա միջավայրի նախարարության  
անտառային կոմիտեի

«16» օգոստոսի 2022թ.  
N 77-1 հրամանով

Նախագահ



Վ. Կիրակոսյան

**«ԳՐԱՆՑՎԱԾ Է»**

ՀՀ իրավաբանական անձանց պետական  
նեգիստրի Նորք-Մարաշի տ/բ կողմից

07.06.2005թ.  
Գրանցման օրը, ամիսը, տարին

գրանց. համար: 273. 210. 04043

03Ա 068727

Պետական գրանցման վկայականի համարը

02512343

ՀՎՀՀ

15. 11. 2021. փոփոխությունը գրանցված է Պետական  
նեգիստրի կենտրոնական մարմնի կողմից  
23. 08. 2022

Պետական նեգիստրի գործառնության պետ



**«ՀԱՅԱՆՏԱՌ»**

**ՊԵՏԱԿԱՆ ՈՉ ԱՌԵՎՏՐԱՅԻՆ ԿԱԶՄԱԿԵՐՊՈՒԹՅՈՒՆ**

**Կ Ա Ն Ո Ն Ա Դ Ր ՈՒ Թ Յ ՈՒ Ն**

(ՆՈՐ ԽՄԲԱԳՐՈՒԹՅԱՄԲ)



## Կ Ա Ն Ո Ն Ա Դ Ր ՈՒ Թ Յ ՈՒ Ն

### «ՀԱՅԱՆՏԱՌ» ՊԵՏԱԿԱՆ ՈՉ ԱՌԵՎՏՐԱՅԻՆ ԿԱԶՄԱԿԵՐՊՈՒԹՅԱՆ

#### Ի. ԸՆԴՀԱՆՈՒՐ ԴՐՈՒՅԹՆԵՐ

1. «Հայանտառ» պետական ոչ առևտրային կազմակերպությունը (այսուհետ՝ կազմակերպություն) ստեղծվել է Հայաստանի Հանրապետության կառավարության 2002 թվականի հուլիսի 25-ի «Հայանտառ» պետական ոչ առևտրային կազմակերպություն ստեղծելու մասին» N 1054-Ն որոշմամբ՝ «Հայանտառ» փակ բաժնետիրական ընկերության վերակազմակերպման միջոցով, և հանդիսանում է նրա իրավահաջորդը:

2. Կազմակերպությունը շահույթ ստանալու նպատակ չհետապնդող, իրավաբանական անձի կարգավիճակ ունեցող բնապահպանական ոլորտի անտառատնտեսավարող կազմակերպություն է, որը գործում է Հայաստանի Հանրապետության Սահմանադրությանը, Հայաստանի Հանրապետության քաղաքացիական օրենսգրքին, Հայաստանի Հանրապետության անտառային օրենսգրքին, «Պետական ոչ առևտրային կազմակերպությունների մասին» Հայաստանի Հանրապետության օրենքին, սույն կանոնադրությանը և այլ իրավական ակտերին համապատասխան:

3. Կազմակերպությունը, որպես սեփականություն, ունի առանձնացված գույք և իր պարտավորությունների համար պատասխանատու է այդ գույքով: Կազմակերպությունը կարող է իր անունից ձեռք բերել ու իրականացնել գույքային և անձնական ոչ գույքային իրավունքներ, կրել պարտականություններ, դատարանում հանդես գալ որպես հայցվոր կամ պատասխանող:

4. Կազմակերպության հիմնադիրը Հայաստանի Հանրապետությունն է՝ ի դեմս Հայաստանի Հանրապետության կառավարության (այսուհետ՝ հիմնադիր):

5. Կազմակերպության կանոնադրությունը նրա հիմնադիր փաստաթուղթն է:

6. Կազմակերպությունը կարող է ունենալ հիմնարկներ, մասնաճյուղեր և ներկայացուցչություններ, որոնք ստեղծվում են լիազորված պետական մարմնի որոշմամբ:

7. Կազմակերպությունն ունի Հայաստանի Հանրապետության զինանշանի պատկերով և իր՝ հայերեն, ռուսերեն ու անգլերեն անվանումներով կլոր կնիք, դրոշմակնիք, կարող է ունենալ ձևաթղթեր, խորհրդանիշ և այլ անհատականացման միջոցներ:

8. Կազմակերպության անվանումն է՝

հայերեն լրիվ՝ «Հայանտառ» պետական ոչ առևտրային կազմակերպություն,

հայերեն կրճատ՝ «Հայանտառ» ՊՈԱԿ,

ռուսերեն լրիվ՝ Государственная некоммерческая организация «Армлес»,

ռուսերեն կրճատ՝ ГНО «Армлес»,



անգլերեն լրիվ՝ State Non-Commercial Organization «Hayantar»,

անգլերեն կրճատ՝ SNCO «Hayantar»:

9. Կազմակերպության գտնվելու վայրն է՝ Հայաստանի Հանրապետություն, քաղ. երևան, Ա. Արմենակյան 129:

## II. ԿԱԶՄԱԿԵՐՊՈՒԹՅԱՆ ԳՈՐԾՈՒՆԵՈՒԹՅԱՆ ԱՌԱՐԿԱՆ, ՆՊԱՏԱԿԸ ԵՎ ՏԵՍԱԿՆԵՐԸ

10. Կազմակերպության գործունեության առարկան և նպատակներն են՝

Հայաստանի Հանրապետության պետական անտառային հողերի և անտառների (այսուհետ՝ անտառային հողեր և անտառներ) կայուն կառավարման՝

1) անտառաշինական նախագծերով նախատեսված համալիր միջոցառումների իրականացման միջոցով անտառների կայուն կառավարման ապահովումը.

2) անտառների արտադրողականության բարձրացմանն ուղղված միջոցառումների իրականացման ապահովումը.

3) կենսաբանական բազմազանության պահպանությունը.

4) Հայաստանի Հանրապետության պետական անտառային հողերի և անտառների (այսուհետ՝ անտառային հողեր և անտառներ) պահպանության, պաշտպանության, կենսաբազմազանության պահպանության ու վերականգնման, անտառապատման և արդյունավետ օգտագործման ապահովումն է:

11. Այդ նպատակով կազմակերպությունը՝

1) լիազորված պետական մարմնի հանձնարարությամբ մասնակցում է անտառային հողերի և անտառների, բուսական և կենդանական աշխարհի հաշվառման գործընթացներին ու նախապատրաստում կադաստրի վարման համար անհրաժեշտ նյութերը.

2) ապահովում է անտառների վիճակի և վերարտադրության վրա ազդող օբյեկտների տեղաբաշխման, նախագծման, շինարարության ու գործարկման պայմանների վերաբերյալ առաջարկություններ լիազորված պետական մարմին ներկայացնելը.

3) ապահովում է լիազորված պետական մարմնին անտառային հողերը ժամանակավոր օգտագործման հանձնելու վերաբերյալ առաջարկություններ ներկայացնելը, տրամադրում անտառահատման և անտառային տոմսեր.

4) մասնակցում և/կամ իրականացնում է անտառաշինական աշխատանքներ.

5) անտառաշինության տվյալների հիման վրա ամփոփում և սահմանված կարգով հաստատման է ներկայացնում բնափայտի մթերման ծավալներն, ինչպես նաև մշակում է առաջարկություններ՝ բնափայտի մթերման ծավալներում ուղղումներ կատարելու վերաբերյալ.

6) իրականացնում է տարեկան հատատեղային ֆոնդի նախապատրաստման աշխատանքները.

7) ապահովում է անտառավերականգնման, խնամքի, սանիտարական, ինչպես նաև բոլոր տեսակի այլ անտառահատումներից և թափուկից բնափայտի մթերումը.

8) ապահովում է անտառահատման աշխատանքների ավարտից հետո հատատեղերի տեղազննումը և աշխատանքների ընդունումը.



9) ապահովում է անտառային տնտեսության վարման հետ կապված արտադրական և շրջանց օժանդակ օբյեկտների կառուցումը.

10) ապահովում է անտառների վերականգնումը և անտառազուրկ տարածքների անտառապատումը, ինչպես նաև սելեկցիոն-սերմնային տնտեսության վարման, տնկարանային տնտեսության ընդլայնման, անտառամեխորատիվ միջոցառումների կազմակերպումն ու իրականացումը.

11) իրականացնում է անտառների արտադրողականության բարձրացմանն ու անտառային պաշարների արդյունավետ օգտագործման միջոցառումներ.

12) սահմանված կարգով իրականացնում է հակահրդեհային անվտանգության, անտառային հրդեհների հայտնաբերման ու կանխման միջոցառումներ, հրդեհների մարման աշխատանքներում ներգրավում մասնագիտացված ծառայությունների.

13) ապահովում է անտառատնտեսական նշանակության ճանապարհների բացումը, անտառային արտադրանքի պահեստավորման համար հարթակների սարքավորումը, ժամանակավոր արտադրական և տնտեսական կառուցվածքների կառուցումը, ավտոտրանսպորտի կանգառման տեղերի կազմակերպումը.

14) իրականացնում է անտառային հողերի և անտառների պահպանության, պաշտպանության, ինչպես նաև անտառների սանիտարական վիճակի՝ վնասատուների ու հիվանդությունների զանգվածային բազմացումների կանխման և դրանց դեմ պայքարի միջոցառումներ, հատման մնացորդներից հատատեղերի մաքրում, անտառօգտագործման հետևանքով անտառային հողերի խախտված հատվածների օգտագործման համար պիտանի վիճակի բերմանը նպաստող աշխատանքներ.

15) ապահովում է բնածին ու մարդածին ազդեցությունների հետևանքով անտառային հողերի և անտառների վիճակի փոփոխությունների բացահայտումն ու կանխարգելումը,

16) մասնակցում է բնագավառին վերաբերող հանրապետական, տարածաշրջանային գիտահետազոտական և գիտափորձարարական ծրագրերի մշակմանը և այդ աշխատանքների իրականացմանը.

17) անտառային հողերը և անտառները պահպանում է ինքնակամ զավթումներից, ապօրինի հատումներից, ապօրինի արածեցումներից, աղտոտումներից, աղբոտումներից և օրենսդրությամբ արգելված անտառային կենսաբազմազանությանը վնաս պատճառող այլ գործողություններից և անտառային օրենսդրության խախտումներից.

18) իր իրավասության սահմաններում ապահովում է ներդրումային ծրագրերով սահմանված գործառույթների իրականացումը.

19) մասնակցում է անտառային մոնիթորինգի և տեղեկատվության միջազգային ու տարածաշրջանային համատեղ ծրագրերի իրականացմանը.

20) կազմակերպում է գիտաճանաչողական զբոսաշրջություն (այդ թվում՝ էկոզբոսաշրջություն).

21) անտառային հողերում և անտառներում ապահովում է ֆիզիկական և իրավաբանական անձանց կողմից անտառային օրենսդրությամբ, ինչպես նաև պայմանագրերով սահմանված դրույթների կատարումը.



22) իր իրավասության սահմաններում իրականացնում է բնակչության էկոլոգիական կրթության ու դաստիարակության միջոցառումներ, անտառային տնտեսության ոլորտի կադրերի պատրաստման և վերապատրաստման աշխատանքներ:

23) իր իրավասությունների սահմաններում իրականացում է միջազգային համագործակցություն, անդամակցում է անտառային ոլորտի միջազգային կազմակերպություններին, մասնակցում անտառային ոլորտի միջազգային ծրագրերին:

24) պատրաստում ու հրատարակում է գիտական և գիտաճանաչողական գրականություն ու տեղեկատվական նյութեր:

25) սպասարկում է լիազորված պետական մարմնի պաշտոնական կայքը, այդ թվում՝ նյութերի հավաքագրումը և տեղադրումը:

26) իրականացնում է Հայաստանի Հանրապետության օրենսդրությամբ և սույն կանոնադրությամբ նախատեսված այլ գործառույթներ,

27) իրենց տիրապետման տակ գտնվող անտառներում պարտավոր են իրականացնել անտառապաթոլոգիական ուսումնասիրություններ անտառների սանիտարական վիճակի վերաբերյալ անհրաժեշտ տվյալներ ստանալու նպատակով:

28) ապահովում է կազմակերպությանն ամրացված անտառային հողերի հատուկ պահպանվող տարածքների կառավարումը:

12. «Հայանտառ» պետական ոչ առևտրային կազմակերպությունն իրականացնում է ձեռնարկատիրական գործունեության հետևյալ տեսակները՝

բնափայտի մթերում, վերամշակում և իրացում,

տնկանյութի (տնկիներ, սերմնաբույսեր) աճեցում և իրացում,

երկրորդական անտառանյութի (կոճղերի) մթերում, վերամշակում և իրացում,

կողմնակի անտառօգտագործում (խոտհունձ, անասունների արածեցում, փեթակների և մեղվանոցների տեղադրում, վայրի պտղի, ընկույզի, սնկի, հատապտղի, դեղաբույսերի ու տեխնիկական հումքի հավաքում) և դրա արդյունքում մթերված կենսապաշարների վերամշակում ու իրացում,

գյուղատնտեսական հողատեսքերում գյուղատնտեսական մթերքի արտադրություն, վերամշակում և իրացում,

հանգստի և զբոսաշրջության հետ կապված սպասարկման ծառայությունների մատուցում,

խորհրդատվության և տեղեկատվության տրամադրում:

### **III. ԿԱԶՄԱԿԵՐՊՈՒԹՅԱՆ ԿԱՌԱՎԱՐՄԱՆ ՄԱՐՄԻՆՆԵՐԸ, ԴՐԱՆՑ ԿԱԶՄԸ ԵՎ ԼԻԱԶՈՐՈՒԹՅՈՒՆՆԵՐԸ**

13. Կազմակերպության կառավարումն իրականացնում են հիմնադիրը, նրա լիազորած պետական մարմինը՝ և գործադիր մարմինը՝ տնօրենը:

14. Կազմակերպության հիմնադիրն ունի նրա գործունեությանը և կառավարմանը վերաբերող ցանկացած հարց վերջնական լուծելու իրավունք՝ բացառությամբ օրենքով նախատեսված դեպքերի:

15. Հիմնադրի բացառիկ լիազորությունները սահմանվում են «Պետական ոչ



առևտրային կազմակերպությունների մասին» Հայաստանի Հանրապետության օրենքով:

16. Կազմակերպության ընդհանուր կառավարումն իրականացնում է Հայաստանի Հանրապետության շրջակա միջավայրի նախարարության անտառային կոմիտեն՝ որպես ոլորտի կառավարման լիազորված մարմին:

17. Պետական լիազորված մարմնի լիազորություններն են՝

1) կազմակերպության կառավարման համակարգի սահմանումը,

2) կազմակերպության կանոնադրության հաստատումը և դրանում փոփոխությունների կատարումը,

3) կազմակերպությանը սեփականության իրավունքով հանձնվող և/կամ ամրագրված պետությանը պատկանող գույքի կազմի հաստատումը.

4) կազմակերպության կառավարման մարմինների ձևավորումը և նրանց լիազորությունների վաղաժամկետ դադարեցումը.

5) կազմակերպության աշխատանքային ծրագրերի հաստատումը և գործունեության վերահսկողությունը,

6) կազմակերպության գործադիր մարմնի՝ Հայաստանի Հանրապետության օրենսդրության պահանջներին հակասող հրամանների, հրահանգների, կարգադրությունների ու ցուցումների կասեցումը կամ դրանք ուժը կորցրած ճանաչումը,

7) կազմակերպության գործունեության մասին հաշվետվությունների լսումը և դրա գործունեության վերստուգման արդյունքների քննարկումը.

8) կազմակերպությանն ամրացված պետական սեփականության օգտագործման և պահպանության նկատմամբ վերահսկողության իրականացումը,

9) կազմակերպության տարեկան հաշվետվությունների և հաշվեկշռի հաստատումը.

10) կազմակերպության լուծարման հանձնաժողովի ստեղծումը և լուծարման հաշվեկշռի հաստատումը.

11) կազմակերպության սեփականության պահպանման նկատմամբ վերահսկողության իրականացումը, նրա գույքի օտարման կամ վարձակալության հանձնման համար համաձայնության տրամադրումը.

12) կազմակերպության եկամուտների և ծախսերի նախահաշվի հաստատումը,

13) «Պետական ոչ առևտրային կազմակերպությունների մասին» Հայաստանի Հանրապետության օրենքով, հիմնադրի որոշումներով և սույն կանոնադրությամբ նախատեսված այլ գործառույթների իրականացումը:

14) հաստատում է կազմակերպության տարեկան հաշվետվությունները և տարեկան հաշվեկշիռը.

15) իրականացնում է օրենքով և հիմնադրի որոշումներով նախատեսված այլ գործառույթներ:

18. Կազմակերպության ընթացիկ գործունեության ղեկավարումն իրականացնում է գործադիր մարմինը՝ տնօրենը, որին պաշտոնի նշանակում և պաշտոնից ազատում է լիազորված պետական մարմնի ղեկավարը: Կազմակերպության տնօրենն օրենքով, հիմնադրի որոշումներով ու այլ իրավական ակտերով և սույն կանոնադրությամբ իրեն վերապահված լիազորությունների սահմաններում ղեկավարում է կազմակերպության



գործունեությունը և կրում պատասխանատվություն օրենքների, հիմնադրի որոշումների, այլ իրավական ակտերի, սույն կանոնադրության և կնքված պայմանագրերի պահանջները չկատարելու կամ ոչ պատշաճ կատարելու համար:

19. Տնօրենի հետ կնքվում է պայմանագիր, որը հիմնադրի անունից ստորագրում է լիազորված պետական մարմնի ղեկավարը: Պայմանագրում սահմանվում են նրա իրավունքները, պարտականությունները, պատասխանատվությունը և փոխհարաբերությունները լիազորված պետական մարմնի, կազմակերպության կառավարման այլ մարմինների հետ, նրա աշխատանքի վարձատրության պայմանները, պայմանագրի դադարման՝ օրենքով նախատեսված բոլոր հիմքերը և այլ դրույթներ, որոնք պայմանավորվող կողմերը կգտնեն անհրաժեշտ: Պայմանագրի դրույթները չեն կարող հակասել Հայաստանի Հանրապետության աշխատանքային օրենսդրության պահանջներին՝ բացառությամբ օրենքով նախատեսված դեպքերի:

20. Տնօրենի պաշտոնում նշանակված անձը չի կարող զբաղեցնել այլ պաշտոն կամ կատարել այլ վճարովի աշխատանք՝ բացի գիտական, մանկավարժական և ստեղծագործական աշխատանքներից:

21. Տնօրենի պաշտոնում նշանակված անձը լրիվ գույքային պատասխանատվություն է կրում իր մեղքով կազմակերպությանը և (կամ) պետությանը պատճառված վնասի համար: Տնօրենի պաշտոնում նշանակված անձի լիազորությունների դադարեցումը հիմք չէ պատճառված վնասի հատուցման պարտականությունները չկատարելու համար:

22. Տնօրենի պաշտոնում նշանակված անձի լիազորությունները դադարեցնող անձը պարտավոր է օրենքով սահմանված կարգով լուծել նրա կողմից պետական կազմակերպությանը կամ պետությանը պատճառված վնասի փոխհատուցման հարցը: Սույն պահանջը չկատարելու հետևանքով կազմակերպությանը կամ պետությանը պատճառված վնասի համար կազմակերպության տնօրենի պաշտոնում նշանակված անձի լիազորությունները դադարեցրած պաշտոնատար անձը կրում է լրիվ գույքային պատասխանատվություն:

23. Տնօրենը պարտավոր է չկատարել հիմնադրի, լիազորված պետական մարմնի՝ օրենսդրությանը հակասող որոշումները, կարգադրությունները, հրամանները, հրահանգները և դրանց չկատարման համար չի կարող ենթարկվել պատասխանատվության:

24. Տնօրենի բացակայության դեպքում, նրան այդ պաշտոնում նշանակված մարմնի գրավոր որոշման համաձայն, այդ լիազորություններն իրականացնում է այլ անձ:

25. Կազմակերպության տնօրենի տեղակալներն ու կազմակերպության մասնաճյուղի ղեկավարները պաշտոնի նշանակվում և պաշտոնից ազատվում են տնօրենի կողմից:

26. Տնօրենը՝

1) առանց լիազորագրի հանդես է գալիս կազմակերպության անունից, ներկայացնում նրա շահերը և կնքում գործարքներ:

2) Հայաստանի Հանրապետության օրենսդրությամբ, հիմնադրի ու լիազորված պետական մարմնի որոշումներով և կազմակերպության կանոնադրությամբ սահմանված կարգով տնօրինում է կազմակերպության գույքը, այդ թվում՝ ֆինանսական միջոցները:



3) տալիս է կազմակերպության անունից հանդես գալու լիազորագրեր, այդ թվում՝ վերալիազորման իրավունքով լիազորագրեր.

4) աշխատանքի նշանակում և աշխատանքից ազատում է կազմակերպության աշխատողներին, նրանց նկատմամբ կիրառում խրախուսման միջոցներ ու նշանակում կարգապահական տույժեր.

5) բանկերում բացում է հաշվարկային հաշիվներ.

6) կատարում է աշխատանքի բաշխում իր տեղակալների միջև.

7) սահմանում է կազմակերպության կառուցվածքն ու կառուցվածքային ստորաբաժանումների իրավասությունները.

8) հաստատում է կազմակերպության աշխատողների թվաքանակը և հաստիքացուցակը.

9) հաստատում է կազմակերպության հիմնարկների, մասնաճյուղերի և ներկայացուցչությունների կանոնադրությունները.

10) օրենքով և սույն կանոնադրությամբ սահմանված իր լիազորությունների սահմաններում արձակում է հրամաններ, հրահանգներ, տալիս կատարման համար պարտադիր ցուցումներ և վերահսկում դրանց կատարումը.

11) ապահովում է կազմակերպության գործունեության մասին համապատասխան հաշվետվությունների կազմումը և դրանք սահմանված կարգով ներկայացնում լիազորված պետական մարմին.

12) Հայաստանի Հանրապետության օրենսդրությամբ սահմանված կարգով ձեռնարկում է միջոցներ՝ կազմակերպությունների և ֆիզիկական անձանց կողմից անտառային օրենսդրության խախտման հետևանքով բնությանը պատճառված վնասը հատուցելու համար.

13) իրականացնում է Հայաստանի Հանրապետության օրենսդրությանը չհակասող և կազմակերպության կառավարման այլ մարմինների չվերապահված այլ լիազորություններ:

## **VII. ԿԱԶՄԱԿԵՐՊՈՒԹՅԱՆ ԿՈՂՄԻՑ ՊԱՀՊԱՆՈՒԹՅԱՆ ԻՐԱԿԱՆԱՑՈՒՄԸ**

27. Անտառային հողերի և անտառների պահպանությունն իրականացվում է կազմակերպության պահպանության ծառայության՝ պահպանության բաժնի և տեղամասային հսկիչների միջոցով:

28. Պահպանության ծառայության աշխատողները՝

1) ապահովում են անտառային օրենսդրությամբ սահմանված դրույթների կատարումը անտառային տարածքներում.

2) կանխում են անտառային օրենսդրությամբ սահմանված դրույթները խախտող ցանկացած գործողություն.

4) կազմում են անտառային օրենսդրության խախտումների մասին արձանագրություններ, դրանք ներկայացնում տնօրենին՝ Հայաստանի Հանրապետության օրենսդրությամբ սահմանված կարգով դրանց ընթացք տալու համար.

5) օրենքով սահմանված դեպքերում վերցնում են անտառային օրենսդրությունը և անտառային հողերում գտնվող արգելավայրերի ռեժիմները խախտող անձանց



իրավախախտման գործիք կամ անմիջական օբյեկտ հանդիսացող իրերն ու փաստաթղթերը:

6) ապահովում են անտառային օրենսդրությամբ սահմանված պահանջների կատարումը:

29. Պահպանության ծառայության աշխատողն օրենքով սահմանված կարգով իրավունք ունի կրելու համազգեստ և օգտագործելու ծառայողական զենք:

30. Ծառայողական պարտականությունները կատարելու ժամանակ պահպանության ծառայության աշխատողների առողջությանը և գույքին պատճառված վնասի հատուցումը կատարվում է օրենքով սահմանված կարգով:

## VIII. ԿԱԶՄԱԿԵՐՊՈՒԹՅԱՆ ԳՈՒՅՔԸ ԵՎ ՖԻՆԱՆՍԱԿԱՆ ՄԻՋՈՑՆԵՐԸ

31. Կազմակերպության սեփականությունը ձևավորվում է կազմակերպության հիմնադրման ժամանակ և հետագայում հիմնադրի կողմից սեփականության իրավունքով նրան հանձնվող, ինչպես նաև կազմակերպության գործունեության ընթացքում արտադրված և ձեռք բերված գույքից:

32. Կազմակերպությունն իրավունք ունի օրենքին, հիմնադրի որոշումներին և (կամ) սույն կանոնադրությանը համապատասխան՝ իր հայեցողությամբ տիրապետելու, տնօրինելու և օգտագործելու սեփականության իրավունքով իրեն պատկանող գույքը:

33. Կազմակերպությանը սեփականության իրավունքով պատկանող գույքի նկատմամբ հիմնադիրը չունի իրավունքներ՝ բացառությամբ կազմակերպության լուծարումից հետո մնացած գույքի:

34. Կազմակերպության սեփականության պահպանման հոգսը կրում է կազմակերպությունը:

35. Կազմակերպությունն անժամկետ և անհատույց օգտագործման իրավունքով օգտագործում (տիրապետում) է իրեն ամրացված գույքը:

36. Կազմակերպության ֆինանսական միջոցները գոյանում են Հայաստանի Հանրապետության պետական բյուջեից, պետական պատվերի կատարման համար հատկացված միջոցներից և կազմակերպության կողմից միջոցառումների իրականացման ու տարբեր ծառայությունների մատուցման դիմաց վճարումներից, հովանավորչական, նվիրատվական, անտառային հողերի և անտառների վարձակալության արդյունքում ստացված վարձավճարներից, ինչպես նաև օրենսդրությանը չհակասող այլ մուտքերից:

37. Կազմակերպության ձեռնարկատիրական գործունեության ընթացքում առաջացած շահույթն օգտագործվում է կազմակերպության կանոնադրական նպատակներին համապատասխան:

38. Կազմակերպությունն ունի ինքնուրույն հաշվեկշիռ, բանկային հաշիվներ՝ Հայաստանի Հանրապետության արժույթով և (կամ) արտարժույթով:

39. Կազմակերպության գործունեության ընթացքում առաջացած շահույթն օգտագործվում է նրա կանոնադրությամբ նախատեսված նպատակների իրականացման համար:



**Ճ. ՎԵՐԱՀՍԿՈՂՈՒԹՅՈՒՆԸ ԿԱԶՄԱԿԵՐՊՈՒԹՅԱՆ ԳՈՐԾՈՒՆԵՈՒԹՅԱՆ  
ՆԿԱՏՄԱՄԲ**

40. Կազմակերպության գործունեության նկատմամբ վերահսկողությունն իրականացնում են հիմնադիրը, լիազորված պետական մարմինը, հիմնադրի կողմից լիազորված, ինչպես նաև օրենքով նախատեսված այլ պետական կառավարման մարմիններ:

41. Կազմակերպությունը հիմնադրի կողմից սահմանված կարգով պարտավոր է հրապարակել իր տարեկան ֆինանսական հաշվետվությունը:

**VIII. ԿԱԶՄԱԿԵՐՊՈՒԹՅԱՆ ՎԵՐԱԿԱԶՄԱԿԵՐՊՈՒՄԸ ԵՎ ԼՈՒԾԱՐՈՒՄԸ**

42. Կազմակերպությունը կարող է վերակազմակերպվել կամ լուծարվել հիմնադրի որոշմամբ և (կամ) Հայաստանի Հանրապետության օրենսդրությամբ նախատեսված դեպքերում ու կարգով:

43. Կազմակերպության լուծարման դեպքում կազմակերպության պարտատերերի պահանջների բավարարումից հետո մնացած գույքն ուղղվում է Հայաստանի Հանրապետության պետական բյուջե: